

Monday, November 17, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

NATIONAL PRESS DAY

Vawiin khan Information & Public Relations Department leh Mizoram Journalist Association chuan DIPR Auditorium-ah 'National Press Day 2025' an hmang a; khuallian I&PR Secretary Pi Betsy Zothanpari Sailo chuan thuthar thehdarhtute chu huai taka dikna kengkawh ngam turin a chah a ni.

Pi Betsy Zothanpari Sailo chuan mipui hriat tura thu puanzar kawngah a dik leh dik loh zirchiang hmasa a, thudik chauh puangzar turin thuthar thehdarhtute a fuih a; a tha zawnga sorkar kaihruai thei tura ngaihtuahna seng thin turin a chah a ni.

(Byte - Pi Betsy Zothanpuii Sailo)

I&PR Secretary chuan MJA memberte chu hriselna ngaipawimawh tura chahin incheina leh news zawn kawngah pawh hmasawn zel a pawimawh thu leh, MJA-in hma a sawn zel theih nan sorkar pawhin theihtawp a chhuah thu a sawi.

Inlawmna thusawitu MJA President Pu Lalrambuatsaiha chuan khawvel ram ropuite chu thuthar thehdarhtute zalenna ram an nih thu leh press mite chu mipui rorelna rama hmun pawimawh tak changtu '4th pillar of Democracy' a nih thu sawiin, thuthar thehdarhtu kalkhawmte chu sorkar khalthngil tura theihtawp chhuah turin a chah bawh a ni.

National Press Day 2025 hmannaah hian kum 20 chhung I&PR Director lo ni tawh Pu LR Sailo, MIS (Rtd), tun thla ni 3-a DoNER Minister Jyotiraditya Scindia hnen atanga a hnathawh that avanga 'Bharat Ratna Dr. Bhupen Hazarika National Award 2025' dawngtu leh, MJA member/accredited journalist Dr. Lalnunkimi Colney, hmeichhe zinga journalism lama doctorate degree nei hmasa berte hnenah Khuallian hian chawimawina a hlan a ni.

National Press Day hi November ni 16 a ni a, Pathianni a nih avangin vawiin khan hman a ni a; thupui chu 'The role of print media-in digital age' tih niin, I&PR Deputy Director Pu Pratap Chhetri kaihruaiin thupui zirhona hun hman a ni bawh.



MPSC

Mizoram Public Service Commission (MPSC) chuan sorkar kum liamta kum April 1 2024 atanga March 31, 2025 chhung khan sorkar hna 349 atan hnalakna advertisement 55 a tichhuak a, hemi chhung vek hian RTI hmanga zawhna 1056 an dawng.

MPSC-in 34th Annual Report 2024-25 a tihchhuah thara a tarlan danin, MPSC hian kum 2024-25 chhung khan sorkar hna (post) 349 atana advertisement

55-a tihchhuahah hian dilna 65,850 a lut a, dilna 2,201 hnawl niin, written exam tum 30 leh personal interview tum 22 an buatsaih hman a ni.

MPSC hian sorkar kum liamta chhung khan Courts case pathum am nei a, heng zinga 1 hi chinfel tawh niin MPSC an chak a, a dang 2 hi Supreme Court ngaihtuah turin ala awm mek a ni.

Kum 2024-25 chhung khan MPSC hian online leh kutziak hmangin RTI zawhna 1,056 dawngin, RTI hmanga zawhna a dawnte hi hna exam-naa mark hmuh zat zawhna leh exam kaihhnawih thil dang hrang hrang a ni tlangpui tih MPSC hotute chuan Akashvani News, Aizawl an hrilh a; chhanna an pek zingah chhanna an pekte dukhawp loh vangin zualko vawi khatna (first appeal) 29 an dawng a, hengah hian chhanna pein, zualko vawi hnihna (second appeal) erawh an dawng lo thung.

Mizoram State Information Commission chuan MPSC hnenah hian RTI zawhna an chhan that avangin RTI Excellence Award 2024-25 lawmman pakhatna a hlan a ni.



MALARIA

Siaha District ah, kum kal mek January atang October thleng khan Malaria sikserh natna vei 1111 hmuchhuah a ni tawh.

Siaha District Chief Medical Officer (CMO) office chhinchhiah danin kumin kal mek January atang October thleng khan thisen sample 14689 chu sikserh an vei leh vei lo enfiah niin, heng zinga 1111 hi sikserh natna vei anni tih hmuchhuah a ni a, Sikserh natna vei zing ah hian Malaria Plasmodium vivax (Pv) vei 782 awmin Malaria Plasmodium falciparum (Pf) vei 329 an awm thung a ni.

District hotute sawi danin Nikum (2024) January atang October thleng khan sikserh vei hi 1523 an awm a, kumina sikserh vei hi nikum nen a khaikhin chuan 417 laiin a tlahniam thung a ni.

Thudawn dan in, Siaha District ah sikserh natna avanga thi chhinchhiah hnahnun ber chu kum 2015 a ni.



LADC POLLS

Lai Autonomous District Council, inthlanpui kumin December 3 a neih turah chuh tum, inhnukdawk duh tana hun tawp, vawiin chhun dar 12 thleng in mi pahnih an in hnukdawk a, ti hian LADC Inthlanpui neih turah Candidate 80 an awm.

Sangau West atanga Independent a chuh tuma hming pe, Pu C.Lallungmuana leh Paithar bial atanga Independent thova chuh tum Pu J.Thangkhuma te chu an inhnukdawk a, ti hian LADC inthlanpui neih turah bial 25 ah Candidate 80 an awm.

MDC bial 25 ah Candidate pahnih awmna bial paruk awmin, heng bial ruk zinga bial hnih, Sangau East leh Sangau West chu BJP leh ZPM inmal beihna tur niin bial dang pali, Sangau South, Lungtian, Bualpui West leh Lawngtlai-III te chu MNF leh ZPM in mal beihna tur a ni a, Candidate pathum awmna bial sawm pakhat

a awm a, Candidate pathum awmna bial te chu Cheural, Lungpher South, Vawmbuk, Lawngtlai Bazar, Lawngtlai Vengpui, Council Veng, Lawngtlai AOC, Chandmary, Pathar Diltlang South leh Sekulh te niin, College Veng, Sakeilui, M.Kawnpui, Tuithumhnar leh Vathuampui te chu Candidate pali awmna niin, Bualpui East, Chawngte ‘P’ leh Bungtlang South te chu Candidate panga awmna a ni.

Inthlanna tluang taka neih a nih theih nan Election Office lam chuan a tah tawlin buaipui ngai, chhun zan zawmin an buaipui a, mawhphurhna nei hrang hrangte pawh an mawhphurhna tha taka an hlen theih nan Training neihpui thin an ni.



JOINT VC

Khawruhlian VC, Sesawng VC I, VC II, VC III leh Sihphir Venghlun VC te chuan Inrinni khan Tuirini kaia Forest Quarters ah Joint Meeting neiin an ram chhunga luidung leh nungchate humhalh dan tur chungchang an rél.

VC Joint Meeting chuan, Sesawng ram chhung, Khawruhlian leh Sihphir Venghlun ram chhunga nungchate leh luidung humhalh chu nasa zawka kalpui nise an ti a. Tuirini leh Tuirial infinna atanga Mausinchhuah thleng chu humhalh bakah a tul anga hmalak chhoh zel nise an ti a ni.

Tuirial leh Tuirini infinna chhak lam, Tuirini lui bikah Joint YMA ten an humhalh lai hi nasa zawka humhalh a nih theih nan Joint YMA te an thlawp tlat bakah a tul anga Joint YMA te hmalakpui tura an in huam thu an tarlang bawk.

